

福建通志

第柒拾伍冊

共壹百冊

福建名宦傳卷二十五

清一 總轄

總督

張存仁遼東人明寧遠副將清順治三年以浙督兼督福建時山海交訌汀延諸屬有爲明魯王守者存仁以次收復草創之始多方拊循士民戴之卒謚忠勤

陳錦字天章正藍旗漢軍人順治五年以浙督兼督福建偕清師入閩賊據延平將軍寨巍峭特甚屢攻不下錦命壘土高與寨齊一鼓而上拔之鄭成功黨鄭綵連踪據長樂連江陷福安羅源永春德化諸縣江西新建王朱由袂攻陷大田尤溪錦次第削平閩地稍謚九年成功復至漳州圍急錦赴援戰江東橋失利退次同安夜半爲刺客所害贈兵部尙書

李率泰字壽籌瀋陽人順治五年以刑部侍郎偕督臣帥兵收復建寧興化同安各郡縣凱還晉吏部左侍郎十三年擢太子太保以浙督兼督閩

時鄭成功屢擾海上率泰疏增水軍造戰艦布閒諜廣招徠十五年命專督福建先後降明都督唐邦杰明忠靖伯陳輝等海寇少靜而山寇方張康熙二年統延建邵三路兵合勦之斬逆首王鐵佛成功子錦復由梁山內犯率泰曰不殄鄭氏山寇亦不得平也率大兵攻廈門金門浯嶼拔之趨八尺門用夜半渡海拔銅山明永安侯黃廷芳率家屬降錦以十數艘遁歸臺灣乃整師勦山寇擒其魁賊平四年卒贈兵部尚書諡忠襄趙廷臣河南人順治閒總督浙閩康熙三年假歸七年泣閩鋤蠹剔奸政聲赫然甫數月奉命巡海卒於途

劉兆麒清苑籍鑲白旗漢軍人康熙八年總督浙閩招撫賊黨明都督阮欽施轟將軍林伯馨等先後以戰船將卒來降鄭錦自是益衰海烽少靖因疏言禁民通海宜先使近海之民得所凡無業者以無主田地官給牛種令墾又申嚴保甲令奸商土豪窩隱者連坐則民不冒險犯禁而偷越之弊可除又言舊報災例夏災不出六月終旬秋災不出九月終旬新制

止於五月九月中旬安必遇災不在限後恐不恤民者藉新制逾限不報恤民者以違時受罰請仍舊得旨如所請行

范承謨字觀公瀋陽籍鑲黃旗漢軍人太傅文程子順治壬辰進士康熙十一年由浙江巡撫特簡總督福建十二年冬抵閩承凋瘵之餘經畫備至逆藩耿精忠有異志會撤藩旨下裁左右鎮兵歸各營承謨與提督王進功密議徐之俟謀成而後遣進功欲亟撤之以孤其勢承謨曰此迫緩散之軍心驅之附逆也於是眾果洶洶會吳三桂反滇訛言益沸客進謀曰盍託備兵延平據上游號召諸鎮嚴兵待變內可以折逆謀外可以待援承謨曰滇閩相距數千里備兵無名且彼反跡未彰若蜚語聞謂我據地謀叛何辭以解或曰盍密檄諸鎮以謁新制府爲名各以精卒至承謨領之未及行十三年三月精忠反巡撫劉秉政輸情於賊給承謨入脅同起事承謨憤詆之遂被拘絕食十日不得死精忠遣秉政來說降且前且揖承謨力蹴之秉政出不意踉蹌仆地走承謨曰羣逆稽誅一蹴之討不

可少也拘三載精忠時遣問訛輒厲斥之後不敢復至著蒙谷自序百苦吟武彝歌以見志無毫楮以薪畫壁有畫壁集十五年清師破仙霞精忠夜遣黨殺承謨燬骸荒郊騎卒許鼎收骸赴京謚忠貞承謨泣閩僅五月士庶謳思弗衰建特祠於道山麓崇祀之幕客生員稽永仁王龍光儒士沈天成范承譜同時被繫不屈死從祀忠貞祠

郎廷相鑲黃旗漢軍人康熙十五年任福建總督時耿變初定餘孽老虎三紀朝佐等尙擁眾連營廷相勦撫互用旬月悉平滇逆遣僞將軍韓大任部眾十餘萬由江右入廷相遣人說降之興泉漳三郡士民爲耿逆拘繫者以千計廷相盡釋之給資遣歸鄭錦山寇朱寅合眾迭犯郡縣廷相屢卻之錦據玉洲等寨分擾石碼江東橋廷相以漳屬兵單請援命大將軍康親王督滿兵協勦廷議廷相不能殄賊以姚啓聖代

姚啓聖字熙止一字憂菴浙之紹興人以鑲紅旗漢軍籍登康熙癸卯順天解元任香山縣註誤去官十三年耿逆亂閩啓聖起郡佐以溫處道銜

從康親王入閩卽遣人說精忠降未決乃單騎至其營精忠大宴啓聖飲
啖指畫詞氣伉爽宴罷長揖去精忠曰是李抱眞之流必不我欺也遂降
啓聖以功遷福建布政使閩自亂後民不堪命輕徭薄賦與之休息慎管
鑰吏歛手莫敢爲奸精忠之降也其黨多畏罪歸鄭錦錦乘虛取內地啓
聖積糧繕械召募壯勇有澄清海外之志吳三桂驍將韓大任者世稱小
淮陰也由贛入汀謀與鄭氏合啓聖說降之簡其兵得死士三千人以爲
親軍十六年隨康親王收復邵武興化盡取漳泉地錦遁歸廈門十七年
總督卽廷相會諸軍討錦失利賊復熾朝命王舉所代卽軍中擢啓聖爲
總督舉循良懲貪墨戢豪暴境內肅清遂移駐漳州開招徠館賊降者優
禮之以示寬大時引數騎招搖城市見廣廈輒盛供帳榜其門曰某鎮公
館某將軍行臺獲賊偵佯示之期善遣之賊自相猜忌十九年二月會提
鎮七路出師破十九寨復海澄進攻廈門金門拔之錦退澎湖諸陷縣盡
復二十年錦死子克塽幼啓聖密陳平臺之計傳爲霖錦之謀主也以計

殺之泉人施琅習水戰熟悉海上情形特薦之爲大帥二十二年六月決策進兵克澎湖七月克壩降命加啓聖宮保予世職由是閩海永清復海界遷居民歸井疆安本業不復知有兵革其初議平海也啓聖故示弛緩會元夕命百姓張燈自與文武大僚置酒還珠門樓上陳百戲爲宴樂漏下二鼓忽稱疾命屬吏行酒而啓聖已開南關疾馳至五虎門調將出師矣康親王督禁旅來閩民苦供億啓聖三疏請救王還師及出境白玉下令禁挾民間婦女竭儲贖歸又置通省郡邑學田供貧士膏伙以病卒於官柩出西郊士庶填衢巷跪奠流涕爲祠洪江潯肖像祀之

王國安字磐石正白旗漢軍人康熙二十三年總督閩浙時臺灣新入版圖國安疏請臺屬府縣學額比照內地由分巡廈門道考收其文武官三年後例得陞轉內地其駐防兵亦請赴汎三年期滿調歸原營又臺澎兵糧就本地支領其俸餉取給內地宜順風信請每年四月撥解夏秋十月撥解冬春得旨如所議行二十六年遷刑部侍郎閩人遮留不得釀金贈

行不受民爲置邵金亭

王隲山東福山人順治乙未進士康熙二十七年總督閩浙甫入境聞湖廣夏包子之亂卽駐節延平授文武方略爲大帥聲援楚氛旣靖赴會城羣不逞竄名行伍煽亂惑眾隲密遣將校擒斃之兇徒解散性清介兩省官弁餽送手示數百言一切禁絕訪知邊海州縣報墾不實及爲戶部力請查勘豁積年虛課若干萬兩民免賠累課款以清

郭世隆字昌伯鑲紅旗漢軍人康熙三十四年總督閩浙端已率屬以愛民恤兵爲念毀淫祠數十區五顯嶺舊有五顯神祠同日自燔人以爲正氣所致又撤耿逆廢府建西南城樓以壯金湯捐俸葺宋儒林之奇祠宇凡賢裔優免銀兩革除者悉復之又請復在官徒役工食兩省均沐其德遷刑部尙書

范時崇字自牧瀋陽人承謨子初爲按察使明允哀矜慈而善斷每朔望詣道山忠貞祠展拜哀慟不自勝僚屬爲之感泣擢山東布政晉廣東巡

撫四十九年總督閩浙捕海盜鄭盡心戮之海道以謚周恤民隱振起人才士飽馬騰疆圉大重尋授左都御史

覺羅滿保字鳧山正黃旗滿洲人康熙甲戌進士五十一年巡撫福建飭紀綱綜煩劇五十五年進總督閩浙奉命巡海自浙江乍浦至閩粵分海之南灣五千餘里建臺寨百二十七所礮位千一百七十有八又疏言臺灣安平鎮水師三營乃諸海岸宜分極衝次衝築墩臺設汛巡守又淡水雞籠山爲極北界其灣港可容百餘巨艦更進爲肩豆門沃野百里番社交據請置淡水營設官駐防以爲後蔽皆報可六十年四月鳳山賊朱一貴作亂全臺陷滿保謂撫臣呂猶龍曰廈門臺郡咽喉當親往以安人心綏輯會城撥濟糧餉請以相屬卽由省疾趨泉州值淫潦乘竹兜從數騎行泥淖中人莫知其爲制府也比至揭示技勇出羣剽悍能殺賊者悉充伍得過在逋者許自效於時漳泉蠢動見示威束身編伍內地無恐飛咨水師提督施世驃督師南灣總兵藍廷珍副之嚴申軍令舟師至者止許

一人登岸市薪菜大軍雲集民不見兵革市肆晏然時全臺惟淡水尙堅
守調守兵千七百餘援之六月十二日發大小戰艦六百餘艦兵萬六千
人分爲三路授諸將策曰至澎湖發視十三日抵澎湖發之則曰並三路
爲一盡銳攻鹿耳門於是世驃以十五日駕潮發港諸軍銜尾進遂復安
平鎮轉戰七鯤身廷珍率精騎由西港登岸繞賊背擊之賊大潰民皆反
正一貫悉眾而遁遂復府治翼日收鳳山諸羅賊眾益北而前所援淡水
兵已結陣以待前後夾擊殲之一貫與其黨十二人逸去諸羅溝尾莊民
楊旭等醉之酒縛獻之凡七日臺郡平加兵部尙書雍正三年卒於位
高其倬字章之鑲黃旗漢軍人康熙甲戌進士雍正四年總督閩浙甫抵
浙聞閩中歲祲卽奏請截江浙漕米二十萬由海運平糶以賑寬臺灣米
禁以濟漳泉民不病饑旣至平生番阿密氏之亂先是康熙五十六年嚴
洋禁至是其倬疏言福興漳泉各府生齒日繁無業者流爲盜請弛洋禁
民之稍富者爲船主爲商人其貧者爲頭舵爲水手一船幾百人一年往

還得千餘金或數百金卽水手之類亦每人可得二三十金其本人長年不食本地米糧又得銀歸養其家下及手藝之人皆大有生業洋船一回開行設鋪足養商賈之家且多有帶外國米歸者此開洋利益也從前諸臣所慮者大約有三一云載米出洋臣查外國皆產米之處不資中國米洋盜多劫米之人無買米之盜且洋盜皆在沿海直洋洋船皆在橫洋之內道路不同似盜米之說爲無足慮一云透漏消息與各外國查外國船到中國廣東之洋船現俱許到外國豈福建之船獨慮漏洩一云外國造船需用中國船料桅舵恐閩船賣與之查外國洋船甚大其夾板船隻皆用整根之木而閩船皆用板片閩省之大桅尙小於外國之頭桅舵之大小亦然何能相資爲用至每船回省請酌量帶米而歸於閩省更屬有益廷議如其所請併定例洋船自外夷回者帶米三百石至百石有差又臺郡水沙連等社番自朱一貴亂後不納賦稅時出焚掠有司不能治五年以其倬專督閩檄文武弁兵分路進勦擒首惡骨宗等二十餘人各社懼

受約束其倬性明恕政舉大綱不矜苛細遇屬吏有恩禮移督兩江後徵拜戶部尙書道卒諡文良

史貽直溧陽人康熙庚辰進士雍正七年總督福建福興泉漳四府積穀日久有司不能遵存七糶三之例以致紅朽而臺灣歲運內地米八萬三千餘石貽直請悉易以穀運貯各倉出舊穀碾米作平糶兵餉諸費陸續換補期以六年可盡易新穀存倉其法經久可行雖易米爲穀穀數倍而運費增然臺穀價賤於內地以穀價所餘充運費而已足從之八年移督兩江

劉世明河南河內人由千總擢侍御雍正七年巡撫福建八年進總督畱意兵防請設督標水師營於福州之南臺撥戰船趕繒船四配坐官兵以時察巡另造八槳哨船以備遊巡又請臺灣下淡水地方遼闊其山豬毛口爲生番出入要隘請增守備鎮之仍隸南路營參將並如所議行

郝玉麟鑲白旗漢軍人雍正十年總督福建值臺灣大甲西等構亂遣兵

勦平之十二年兼領浙江改閩浙總督奏升福寧州爲府永春龍巖二縣爲州改建寧協爲鎮臺灣北路營爲協南路分防山豬毛口爲營先是彰化縣勦滅之牛罵等三社田畝奉命仍歸番民部議漢人耕番界田畝者盡還之以杜其爭擾王麟覆言漢民耕番田係番黎契賣而流寓十數萬人耕番地二十萬畝若令歸還不但原價難追漢人無田可耕失其故業番人無力以耕荒其熟地彼此不願請將現所耕地查明四至注册存案以後禁買部無以難福建頻年缺食請截漕廣采買籌兵籌食不遺餘力喀爾吉善號澹園滿洲正黃旗人乾隆十二年由山東巡撫擢閩浙總督端重靜鎮有大臣體時臺灣生番跳梁授機宜平定之番人自此尤向化建寧匪類魏現漳州匪類蔡榮祖先後謀不軌事露擒其渠魁置之法累加太子太保卒謚莊恪祀賢良祠子定長乾隆二十七年任福建巡撫蘇昌正藍旗滿洲監生乾隆二十九年總督閩浙三十一年淡水廳屬鶯殼莊民爲生番焚殺多人檄官兵嚴緝之事平因條奏事宜凡近番零戶

悉遷附大莊酌撥弁兵移駐捍衛連望樓嚴守望禁墾界外荒埔並禁漢人不得侵佔熟番產業以免越界滋事卒謚愨勤

福康安鑲黃旗滿洲人乾隆五十三年任先是乾隆五十一年冬臺匪林爽文謀逆滋事官兵持數月不下五十二年命福康安以協辦大學士爲將軍及參贊海蘭察帥師來閩渡臺勦滅之獲其魁遂奏凱歸旋授閩浙總督時大兵之後繼以旱荒甫下車籌經費檄閩侯兩邑延省中紳士疏會城河渠濬城西小西湖以興水利溉農田疏穢惡城中頻不戒於火聞報卽單騎飛至帥營員親自撲救參游以下有逡巡者立鞭之賞罰嚴明肅清吏治值歲暮侯邑令某以官物勒質弗遂憾之向例質鋪票據字皆草書令以字畫糊塗責令一體作楷質鋪難之同時罷當城市囂然福康安聞之立予撤任門丁經胥通同串詐依律辦理由是官民帖然其課釐峯也親臨考校謙恭愛士常如不及尋調兩廣總督

趙慎畛字遂樓湖南武陵人嘉慶丙辰進士道光三年由廣西巡撫遷閩

浙總督飭吏治正民風求泉漳治法以息械鬪謂士爲四民之首鄉黨所矜式欲正民風先端士習以鼇峯鳳池兩書院爲全閩養士之區多高才生定規條勤考課增膏油培植備至文廟丁祭久弛祭器缺如文武僧生多胥斗子弟充之慎畛曰此非所以重祀典也通飭各學教官重修祭器舉里中之秀者充僧生於是春秋二丁氣象煥然一新又偕巡撫孫爾準疏請明儒黃道周從祀廟廡及鄉先生輩有德行道誼著述表見者閩縣張甄陶孟超然侯官謝金鑾長樂陳庚煥福清陳九齡德化鄭兼才六人入祀各邑鄉賢祠以彰風化以奮人心時鳳池書院創始落成官紳樂捐輸充經費慎畛於院中建佳士軒以示鼓勵政務實不務名有恩亦有威整營伍修器械剔蠹弁覈奸胥蒞任未滿三載調雲貴總督瀕行畱白金千兩倡紳士舉恤嫠會福州敬節堂所由設也自是孀閨恤緯漸次廣額至今仰給者四百五十餘人踰年卒於滇之官署諡文恪閩人士繫思不忘設水主於佳士軒歲時祀之

孫爾準字平叔江蘇金匱人嘉慶乙丑進士十九年由翰林院編修出守汀州屬寧化有糾眾獄大府欲當以叛逆爾準曰此屬相煽歛錢耳法其魁而散其黨所至勤求民隱奸弊不售二十一年遷鹽法道二十五年遷按察使尋擢布政使先是參員及已故賠款有旨弗問前政不爲釐爾準悉豁之本員及旅櫬始克歸里擢安徽巡撫道光三年調福建巡撫稔知延建上游阻險多劫案請撥鹽庫曬帑息爲懸賞購線費盜多獲兩郡清肅四年巡臺灣周歷形勢請於彰化嘉義閒開五條港正口噶瑪蘭開烏石港正口以饒內郡移鳳山埤治於故城興隆里以固東北嚴漢佃據番田之禁以安番人五年授閩浙總督值歲收歉豫請開海禁募運浙米以賑各屬囤積者無可居奇價悉平六年五月彰化匪徒糾黨與粵莊械鬪羣不逞造謠焚掠蔓及嘉義淡水所在不靖警聞爾準馳赴廈門檄副將邵永福率兵由五虎門對渡八里坌趨艋舺阻其北竄總兵陳化成斜渡鹿港截其入海之路已乃東渡直指彰化獲著名盜首數人戮之揭示械

鬪者與焚搶殊科焚搶者仍別首從初犯積犯定擬脅從解散者省釋人心大定搜餘黨令閩人捕閩粵人捕粵化其分類之見旬日廓清而番割滋事番割者漢人通番語竄內山娶番婦時引生番劫掠平民而黃斗乃黃武二等爲之魁粵莊勾引之出助鬪爾準曰不剪番割亂未已分兵三路由斗換坪鹽水港南港入擒斗乃等二十餘人臺郡平凱歸加太子少保道莆田見木蘭陂淤嘆曰南北二洋溉田四十萬畝爲閩省第一水利今半爲斥鹵必復之百世之利也遂捐俸倡修並小西洋延壽陂悉深通之自是福州之東西湖三十六灣通潮便舟楫者以次修復拓貢院千餘楹敞號舍復闢鳳池院疏請明儒黃道周從祀文廟又奏修福建通志未及成卒於位贈太子太師諡文靖